

Lo sigui cu su maneho pa baha gastonan di huur

ORANJESTAD –Un di e puntonan cu a wordo treci dilanti door di pa minister Benny Sevinger encarga cu Infrastructura ta cu Gobierno lo sigui cu e maneho pa baha gastonan di huur manera a bin ta haciendo ultimamente.

Na inicio di e prome gobernacion na 2009, a haci un analisis di cuanto edificio Gobierno ta huur for di sector priva. E resultado tabata mas di 60.000 m² cu tabata costa mas di 24 miyon florin pa aña. Mirando e gasto grandi aki, a tuma e decision pa renoba edificionan di gobierno pa baha e gastonan di huur y na mesun momento

crea cuponan di trabou den sector di construccion. A logra finalisa construccion di edificio di Corte, for di cual a spaar un suma grandi na huur, despues cu nan a

muda na december ultimo pa Emanstraat/Hendrikstraat bek. Den e plan di renobacion y expansion, a construi edificio Cocolishi y a renoba un parti di e sede bieu di

Bestuurskantoor, cu cual a spaar 1 miyon florin di huur pa aña. Edificionan di Gobierno cu a renoba ta: watertoren na Playa y San Nicolas; ex edi-

ficio di Ambulance; edificio DIMAS/DAO, cual ultimo aki lo keda cla na luna di mei pa juni di e aña aki. Otronan cu ta den renobacion ta ex museo den Zoutmanstraat; ex oficina Havenkantoor (Turismo), cual lo keda cla den e proximo lunanan.

Pa loke ta proyectonan renobacion nobo bou di e gobernacion cu a caba di inicia, Minister Benny Sevinger a menciona ex edificio di DOW, cu lo bira sede di Censo; edificio di Duana na San Nicolas; Oficina nobo di Duana na Barcadera (mientras cu esun existente lo wordo bendi); KPA Playa; Cas di Gobernador y KIA. □

